



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**49. Kalenderwoche – ab 6.Dezember 2009**

## **Dor Weihnachdskarbfn - erschdor Deel**

Dor Familienrad, dähr haubdsäschlich aus meinor Gudstn un meinor Schwieschormuddor beschdehn dud... un aus dähm Resd von ungefähr fünf bis zähn weidore Bersohnen, die abor vogleichsweise nischd zu meldn hamm! - also, dähr Familienrad hadde vorvorsches Jahr einschdimmisch beschlossn: Näschsdes Weihnachdn duds ma keen Gans gähm, sondorn Karbfn! Dann mussde sisch noch eenor freiwillisch meldn, dähr dähm Karbfn koofn dun sollde. Abor weil meine Gudste weeß, dass sisch in dor Familje keenor freiwillisch meldn dud, wenna was ährenamdlich zu erledischn gibd, da hadse misch gleich als Freiwillischn ausgesuchd un beschdimmd, dass isch dähm Karbfn koofn soll. Meine Schwieschormuddor hadde dähm Fingor gehohm un noch dazugefieschd: "Abor een großn aus einheimische Gewässor!"

Das war vorvorsches Jahr. Vorsches Jahr nu, kurz vor Weihnachdn, war de Zeid ran, un meine Gudste hadde misch vorsorschlich orinnord, dass isch dor freiwillische Karbfnkeefor bin. Da binsch dann also irschendwann baar Daache vor Weihnachdn los.

Abor in dähm Fischladn bei uns an dor Egge gabs keene Karbfn mähr. Das heeßd, die, die da in dähm Wassorbeggn rumgedimbeld ham, warn alle langfrisdich vorbeschdelld. Binsch also in de Schdadt nein. Abor in dor Schdadt drinne in dähm Fischgeschäfd das gleische - alles vorbeschdelld! Nu hammse vorsuchd, mir ersadzweise was annersch offzuschwadzn - Zandor, Scholle... odor dann so egsodische Vieschor - Bangradsjus un so was, wo de nisch ma weeßd, wie die geschriem wern. Wobei - guhd - wenn mir das Vieh dann vordilschd hamm dädn, wärs bfeifegal, wie sisch das Vieh schreim dud - gefressn is gefressn!

Das is ja ooch bei Boggwurschd so. Wenn de Boggwurschd offgefressn is, dann duds ooch keen indressiern, ob sisch Boggwurschd mid dobbel-"g" odor bloß mid eenfachn "g" schreim dud!

Abor ma abgesähn von dor Schreibweise - mid so eim Bangradsjus odor sowas hädde isch daheeme nisch offdauchn derfn. Meine Gudste had mir das dann ooch beschädischd. Bangradsjus, had se gesachd, so heeßd irschend e Heilischor. Un Heilische sinn irschendwie nisch so rischdisch zum Vorzähr geeischned. Grade in dor Weihnachtszeit! Karbfn sinn bessor geeischned!

Findisch gewordn bin isch dann am annorn Ende dor Schdadt. E kleenor Ladn un in dähm Wassorbeggn dord war noch eenor drinne, dähr zwar ooch vorbeschdelld, abor nisch abgehold wordn war. Un so had dähr ooch geguggd - wie beschdelld un nisch abgehold!

Abor ansonsdn - e Brachdegsemblahr! Die Vorkeeforin hädde ibrischens gladd mid dähm Karbfn vorwand sein kenn - ooch e Brachdegsemblahr un had mid ihre Oochn so geguggd wie dähr Karbfn - so nedd un dreihärzisch! Sechs Bfund had dähr dann off de Waache gebrachd! Allordings nisch aus einheimische Gewässor. Dähr Karbfn war e Dschesche. Bfeif droff, dachd isch mir - das dud keenor merkn. E Karpfn had schließlisch kee Nadsjonallidädnzeeschn dran. Dähn nemm isch!

Fordsedzung folschd! –

**Eduard Sachsenmeyer**